



Lëtzebuerg, de 27. Mee 2024

Här President,

Esou wéi d'Chambersreglement et virgesäit, bieden ech lech, dës **urgent** parlamentaresch Fro iwwert **d'Informatiounen am Courier zu der Bréifwal** un den **Här Inneminister** weiderzeleeden.

Zanter der leschter Woch ginn d'Courriere fir d'Bréifwal un d'Bierger:inne geschéckt, déi sech fir d'Europawale vum 9. Juni 2024 fir d'Bréifwal ageschriwwen hunn.

De Courier beinhalt nieft dem Stëmmziedel an den Enveloppë fir de Retour och déi individuell Convocatioun, wéi och en Dokument mat Erklärungen fir d'Bréifwal richteg zeréckzeschécken. D'Dokument, op deem erkläert gëtt, wéivill Stëmmen ee ka verginn a wéi ee richteg wielt schénkt a munche Gemengen awer net deel vum Envoi ze sinn. Wien niewt senger Convocatioun just d'Dokument "Prozedur fir d'Bréifwal" matgeschéckt krut, huet also net all d'Informatiounen déi noutwendeg sinn fir de Stëmmziedel richteg auszufëllen, schlëmmer nach, d'Piktogramme suggeréieren esouguer, dass ee just 5 Kräizer dierf maachen.

An dësem Kontext erlaben ech mer et folgend Froen un den Här Minister ze stellen :

1. **A wéi ville Gemenge gouf d'Dokument mat den Erklärungen zur Stëmmevergab net matgeschéckt?**
2. **Wéi gesäit den Här Inneminister d'Problematik vun de feelenden Informatiounen am Courier fir d'Bréifwal wat d'Validitéit vun de Walen ugeet?**
3. **Wat plangt den Här Inneminister, fir déi onkomplett Informatiounen richtegzestellen?**
4. **Wier et net sënnvoll, an deene vum Oubli betraffene Gemengen eng statistesch Analys vun der Bréifwal ze maache, fir den Impakt vun der feelender Informatioun op d'Walverhale vun de Bierger:innen z'analyséieren?**

Mat déiwem Respekt,

Meris SEHOVIC
Députéierten



Äntwert vum Inneminister Léon Gloden op déi urgent parlamentaresch Ufro n° 797 vum honorabelen Deputéierten Meris Sehovic vum 27. Mee 2024 iwwer d'Instruktiounen zu den Europawalen

1. A wéi ville Gemenge gouf d'Dokument mat den Erklärungen zur Stëmmevergab net matgeschéckt?

D'Dokument mat den Instruktiounen fir de Wieler ass de Gemengen, sou wéi üblech, vum Staat a vum SIGI zur Verfügung gestallt ginn. Fir d'Verschécke vun dësem Dokument un de Wieler, sinn d'Gemengen zoustänneg. Op telefonesch Nofro bei alle Gemengen huet sech erausgestallt dass et sech just em siewe Gemengen handelt.

2. Wéi gesäit den Här Inneminister d'Problematik vun de feelenden Informatiounen am Courier fir d'Bréifwal wat d'Validitéit vun de Walen ugeet?

Opgrond vun der Unzuel u Fäll wou d'Instruktiounen gefeelt hunn, huet dëst keen Impakt op d'Validitéit vun de Walen. D'Gemenge sin och invitéiert gin fir d'Instruktiounen nozereechen wéi an der Äntwert op d'Fro präziséiert get.

D'Instruktiounen fir d'Wieler kennen desweideren och ënnert enger paraphrasierter a vereinfachter Form op folgenden Internetsäite vum Wieler consultéiert ginn:

- <https://elections.public.lu/>
- <https://elections.europa.eu/fr/how-to-vote/lu/>
- <https://jepeuxvoter.lu/>
- <https://guichet.public.lu/>
- <https://zpb.lu/>

3. Wat plangt den Här Inneminister, fir déi onkomplett Informatiounen richtegzestellen?

Als direkt Reaktioun op des parlamentaresch Fro, sinn déi concernéiert Gemengen vum Inneministère opgeruff ginn, deejéinege Wieler, déi d'Dokument mat den Instruktiounen net solle krit hunn, nozereechen.

Wat d'Dokument „Prozedur fir d'Bréifwal“ ugeet, sou handelt et sech heibäi em eng bildlech a vereinfacht Veranschaulichung vun der Prozedur fir d'Bréifwal. Dëst Dokument ass net vum Gesetz virgesi mee soll dem Wieler hëllef besser ze verstoen a wéi eng Enveloppe e säi Stëmmziedel soll leen fir dësen zeréckzeschécken. Dëst Dokument, wat och scho bei virechte Walen verschéckt ginn ass, enthält kengerlee Indikatiounen zu de Reegele fir säi Stëmmziedel auszufüllen. An deem Sënn ass och de Walziedel deen dorop ze gesinn ass als Beispill gemengt.

4. Wier et net sënnvoll, an deene vum Oubli betraffene Gemengen eng statistesch Analys vun der Bréifwal ze maache, fir den Impakt vun der feelender Informatioun op d'Walverhale vun de Bierger:innen z'analyséieren?

Esou eng Statistik ass net realiséierbar ouni géint d'Walgeheimnis ze verstoussen.



LE GOUVERNEMENT
DU GRAND-DUCHÉ DE LUXEMBOURG
Ministère des Affaires intérieures

Luxembourg, le 29 mai 2024

Le Ministre des Affaires intérieures

(s.) Léon GLODEN